

PASSIONEM CHRISTI
CEU
CHRISTIANÆ VITÆ
SPECULUM

O. O. C. A.

REPRÆSENTAT

WILH. DAV. HABERMANNUS,


MED. D. P. P. & POLIATER

p. t.


ACADEMIÆ RECTOR



ROSTOCHII,
Literis JOH. WEPPLINGI, SERENISS. PRINC.
& ACADEM. Typogr.



162



Christum, dulcissimum Salvatorem nostrum, nostrum
loco patientem, exemplum nobis reliquisse, ut in-
sequeremur vestigia ipsius, divino agitatus Spiritu A-
postolus Petrus nos docuit 1. *Epist.* II. 21. Non, quod iste
vel solus, vel primarius passionis Christi scopus atq;
finis sit, uti quidem Christianismi nomenclaturam mentiens,
at quam longissimè ab eo adhuc aliena, Socinianorum turba
perperam persuasum sibi habet; sed, quod, præter primarium
ejus finem, quem redemptionem universi in peccata prolapsi ge-
neris humani esse, ex *Matth. XX. 28. Gal. III. 13, IV. 4. 5.* &
quamplurimis aliis apertissimis Scripturæ locis novimus, sicuti
& ipse Petrus, Christum peccata nostra pertulisse in corpore
suo super lignum, hoc ipso in capite *seq. v. 24.* attestatur: etiam
ad hoc passio Redemptoris inserviat, ut speculum quasi nobis
esset, quod intuentes delineatum in eò deprehendamus christi-
anæ vitæ cursum, quidq; tum deceat, tum oporteat eos, qui non
tam affectant, quam cum re ipsa gerere student Christianorum
nomen. Ita Christum Petrus dicit nobis reliquisse *ὑποχαρακτὸν*,
per Metaphoram quandam à pictoribus vel scriptoribus de-
sumtam, qui discipulis exemplar seu archetypum quoddam pro-
ponunt, quod scribendo pingendove æmulentur. Adeoq; mo-
nitos isto vocabulo nos vult, ut, quantum fieri potest, ad imita-
tionem Christi Christiani vitam nostram instituamus. Et
sanè, si integram percurrere liceret passionis Christi historiam,
vel universæ Christianæ vitæ in eadem exemplum offensuri es-
semus: id vero dum per chartæ huic descriptioni destinatæ spati-
um non licebit, nec concatenatæ occupationes aliæ permittent,
ad Sacrorum publicorum Antistites, melius Vos, *CIVES ACADE-*
MICI O. O. HONORATISSIMI! proluxiusq; ex publicâ Ecclesiæ Ca-
thedrâ hac de re instructuros, ablegandi eritis. Interim, ut &
meo officio, si non ex assè, ex parte tamen, satisfaciam, repræ-
sentabo & ipse Vobis passionem Christi ceu Christianæ vitæ
speculum, ut in eo Vosmet contemplati, exemplum imitemini
illius



58700(57)

illius, qui ipsemet sese nobis exhibere voluit exemplum. Et quidem, uti vita christiana consistit tum in mali omissione, tum in commissione boni: regula namq; ejus sive norma lex est, quæ & fugienda prohibet, & facienda præcipit; ita passio Christi, ejus exemplum si imitamur, nos mala fugere, bona sequi, docet. Admonemur ejus ab ipso Petro, quando *l. c. v. 24.* scribit: Christus *peccata nostra ipse pertulit in corpore suo super lignum*, ecce passionem! *ut peccatis mortui, justitiæ viveremus*, ecce speculum integræ Christianæ vitæ! Emortuum corpus sensu rerum destitutum est: ita nos peccatis moriamur, passio Christi vult. Equidem, quamdiu hanc mortalem vitam vivimus, adeò non sumus à peccato liberati, ut ne quidem sensus illius, nisi in ipsâ morte demum, à nobis tollatur. Moriendum nihilominus peccato in tantum est, ne regnet in mortali nostro corpore, ut obediamus illi per cupiditates ejus, uti loquitur Paulus *Rom. VI. 12.* Moriendum peccato est, ut nullum planè ipsius, qui cum approbatione ac delectatione conjunctus sit, sensum habeamus. E contrario, in speculo passionis Christi videmus, justitiæ vivendum nobis esse. Vita justitiæ vel de justitiâ imputatâ intelligi potest, quando nempe DEUS perfectissimam Christi justitiam verâ fide apprehensam nobis imputat, sicque propter illam nos justificat, seu justos pronunciat atque declarat; vel de justitiâ inhæsiâ, quæ virtus in nobis est, à quâ justæ proficiscuntur & internæ & externæ actiones. Quantumvis alioquin regeniti atq; fideles in justitiâ Christi à DEO ipsis imputatâ vivant, unde nihil in illis condemnabile est, *Rom. II. 13.*; haud tamen Petrus *b. l.* eandem præcipuè intelligit, sed de vitâ justitiæ inhærentis loquitur, ut videlicet id in vitâ agamus, quod justum est sanctumque. Unius enim justitiæ nomine, quicquid virtutum Christianarum in verbo Divino præscriptum nobis est ac commendatum, comprehendit. Non quidem, quod exactè justam agere vitâ valeamus: id enim in hoc immundo mundo promittere sibi aut sperare quis auset? sed ut in cunctis actionibus nostris justitiæ studeamus, eidemq; nos totos dedamus totosq;. Et hoc à nobis

passio Christi requirit , quod & Paulus passim epistolarum suarum indicat. Inter alia notabilis planè locus est *Tit. II. 11. sqv.* quem vel quotidie meditentur Christiani , inque omnibus actionibus oculis quasi obversantem respiciant , conveniens est. *Illuxit, sunt Apostoli verba, gratia DEI salutis fera omnibus, erudiens nos, ut, abnegata impietate & mundanis concupiscentiis , sobriè & justè & piè vivamus in presenti seculo, expectantes beatam illam spem & apparitionem gloriae magni DEI, & Servatoris nostri Jesu Christi, qui dedit semetipsum pro nobis, ut redimeret nos ab omni iniquitate, ut purificaret sibi ipsi populum peculiarem, sectatorem bonorum operum.* Scilicet, non est, ut quis sibi persvadeat licentiam peccandi , posteaquam Christus peccata nostra pertulit in suo corpore, quin potius passiones illius propter peccata nostra in memoriam semper revocare nobis debeant officia nostra. Pati namque voluit Christus, ut purificaret sibi populum proprium , populum christianum, & ab ipso denominatum, & ipsum Dominum suum agnoscentem, & illius ex mandatis vitam instituentem, ipsum eum Dominum suum imitando. Licet enim per Baptismum quoq; repurgemur à peccati sordibus ; non tamen ea sola purificatio , neq; primario hic intelligitur , sed quam ante indicaverat Paulus per *abnegationem impietatis mundanarumq; concupiscentiarum.* Et quemadmodum passio Salvatoris tendit ad remotionem impietatis ; ita non minus pietatis quoque reparationem respicit. Etenim redempti per eum sumus ab omni iniquitate, ut sectatores simus bonorum operum , videlicet , ut ante dictum erat , *sobriè erga nosmet ipsos , & justè erga proximum nostrum , & piè erga DEUM vivendo in presenti seculo.* Ecce igitur in passione Christi christianæ vitæ speculum ! Et non in genere tantum christianam vitam vivis quasi coloribus in illa depictam deprehendimus , quin etiam speciales in eadem Christianum quemlibet decentes virtutes cernere datur. Videmus hîc exemplum obedientiæ Deo promptissimè, non in prosperis solum, sed adversis quoq; rebus exhibendæ. Cum in eo jam esset , ut imminentes sibi passiones sustinere aggredere-
retur

retur Salvator ; ac in montem olivarum egressus effusam in se propter nostra peccata iram divinam perferre jamjam inciperet, Patrem quidem rogabat, si vellet, ut ab ipso poculum istud transferret, mox autem addit : *veruntamen, non mea voluntas, sed tua fiat, Luc. XXII. 42.* Unde etiam Paulus *Phil. II. 8.* de ipso testatur: *Humilem præbuit semet ipsum, factus obediens usq. ad mortem, mortem autem crucis.* Habemus hîc, CIVES OPTIMI ! quod imitemur. Quamdiu res nostræ prospere fluunt, DEUM sequi, illius jussis obedire, & ad ipsius voluntatem voluntatem nostram componere nobis videmur. At si quid adversi nobis evenit, tum demum, si rectè nos nostrosque affectus exploraverimus, institutâ cum obedientiâ Christi comparatione, sentiemus, non adeo nos pronos ad obediendum DEO esse. Nam non solum, quando bene nobis est, divinæ voluntati obsequi nos oportet, verum etiam in malis nos affligentibus, etiamsi eadem injustè citra meritum nostrum pati nobis videamur. Ubique enim ac omni in fortunâ, ad imitationem Christi, dicere nos oportet : non mea, benignissime Pater ! sed tua voluntas fiat. Cumq; illa obedientia conjunctam in speculo passionis Christi cernimus patientiam summam, & nobis ideo sequendam. In illo tantâ ea fuisse deprehenditur, ut suo jam tempore de ea vaticinatus Esaias *Cap. LIII, 7.* pœnalis passionis patientissimam hanc tolerantiam descripserit, quod eâ futurus esset Servator mitissimus ad instar *parvæ pecudis ad mactationem adductæ, & ovis coram consoribus suis obmutescens, non aperturus os suum,* atque adeo ne minimum quidem vel impatientiæ vel minationis signum ex eo egressurum. Istiq; prædictioni omnino respondit eventus, ex apertissimo testimonio Petri i. *Ep. II 23.* scribentis: *Quum maledictis incessaretur, non recessit maledicta, cum malis afficeretur, non minabatur, sed tradidit vindictam ei, qui judicat justè.* Quâ in virtute ut imitentur Christum Christiani, patientiam in omnibus afflictionibus, quacunq; ex causa à cœlesti Patre, cujus sine nutu aut permissione nihil nobis adversi contingere potest, immixtis, exhibentes, expresse jussit Apostolus

stolus

stolus in antecedentibus: *Hac est gratia, si quis propter conscientiam Dei,* (quia DEUM novit, ei que patientiam placere scit) *suffert molestias, prater meritum affectus malis. Quæ enim est laus, si quum peccantes alapis cadimini, suffertis? sed si quum benefacitis, tamen malis afficimini, suffertis, hac est gratia apud DEUM: Siquidem in hoc vocati estis, quoniam & Christus afflictus est pro nobis, relinquens nobis exemplum, ut insequeremini vestigia ipsius.* Quæ licet proximè ad servos ab he-
ris mala patientes directa sint; quemlibet tamen fassurum autumo, de omnibus etiam Christianis illud dictum atque intelligendum esse. Estque per argumentum à majori ad minus hinc concluden-
dum: Si in malis injustè nobis inflictis patientiam ad imitationem Christi exercere nos oportet; quanto igitur magis, si justè patimur, propter peccata nostra? Coram DEO autem nemo justus est, ut non nisi pœnam mereamur omnes. Sed ad aliam in omni Christianâ vitâ exercendam virtutem progrediendum nobis erit, quam, ceu in speculo, in passione Christi observamus, à nobis propterea quo-
que exprimendam. Humilitatem indigito christianam, quam vi-
vis quasi coloribus in Christo depinxit, simulq; illius ad imitatio-
nem cohortatur Paulus *Phil. II 5. sqv. Is, ait, affectus sit in vobis, qui fuit & in Christo JESU, qui quum esset in forma DEI; (tota plenitudine DEitatis corporaliter in eomet habitante, Col. II. 9.) non rapinam ar-*
bitratus est, ut esset æqualis DEO, sed semet ipsum exinanivit, formâ servi, (consistente in statu & conditione humanæ naturæ naturali atque tenui) *assumtâ, in similitudine (naturalium ac infirmorum, quan-*
tumvis sine peccaminosis infirmitatibus) hominum constitutus & in
schemate repertus ut homo. Humiliavit se ipsum, factus obediens usq; ad
mortem, mortem autem crucis. Hanc igitur virtutem sectemur, offi-
cium nostrum est, si Ducem nostrum, à quo denominationem ge-
rimus, sequi velimus. Non decet servum superbire, cujus Do-
minus humilem se exhibet. Et quid superbia est? fons & origo
omnium peccatorum. Quæ nobis superbiendi causa? quibus ni-
hil est, quod non à DEO quasi commodato acceperimus, in tan-
tum, ut nec ipsimet nos nostri simus. Qui ergo nos superbos ge-
rere

erere vellemus, ubi Dux noster Dominusque humillimum sese gessit? Ex verâ illâ humilitate Christianâ profluit porro, cumq; patientia conjuncta est mansuetudo christiana, quam in speculo passionis Christi itidem ob oculos nobis positam videmus. Mitem sese ac mansuetum exhibuisse Salvatorem in suis passionibus, jam ante percepimus, adeo quidem, ut maledicentibus maledicta non regefferit, affligentibus minatus non sit, vindictam tradens ei, qui justè judicat, 1. *Petr.* II. 23. Cum primis autem imitandæ mansuetudinis effectus pariter ac testimonium est, quod ipse, in cruce pendens animamque suam mox Patri commendaturus, pro crucifixoribus suis orabat, exclamando: *Pater, remitte illis, nesciunt enim, quid faciant*, ceu apud *Luc.* XIII. 34. legere est. Ex quo discamus dilectionem etiam inimicorum nostrorum, non fucatam, sed veram atque sinceram, oportet. Id quod, uti omnes in universum Christianos decet; ita Vobis cum primis convenit, qui inter nos non iisdem literarum Studiis tractandis commilitones estis, & hos inter quam maximè, qui Vosmet sacris literis consecratis. Utinam! exemplum patientis Christi oculis vestris omni tempore observaretur. Non enim, spero, tot inter Vos jurgia, tot periculosa, nonnunquam etiam funesta tristiave, in cœtu vestro duellum exoritura essent. Si quid forte injuriarum experti fueritis, ut damnum passi, ad Magistratum vestrum recurrite, justitiam Vobis minimè denegaturum, sed injurias amoturum, & contra æsiones Vos defensurum, tantum ut inimicitiarum privatæq; vindictæ, à DEO severiter prohibitæ, occasiones causæq; tollantur. Dicerem de pluribus, quæ in passione Christi, velut in speculo, oculis propositæ nostris sunt, imitandæ à nobis virtutes. At sufficere debet vel paucissimis attigisse, quæ in omni vita & communi conversatione, omni & loco & tempore, observandæ nobis sunt, nisi Christianorum nomen, à Christo longè alieni, penitus indignè gerere velimus. Ad hoc igitur speculum, *CIVES HONORATISSIMI*! accedatis, Vos vestramque vitam in eo contemplari. Id si feceritis, nullum superesse dubium potest, quin vari-

as vitæ hætenus peractæ defectus animadverturi sitis. Qui faci-
em suam in speculo considerantes in illa maculas deprehendunt,
confestim easdem ablucere & abstergere nituntur, ut repurgatâ fa-
cie incedant, maculas dedecori sibi esse reputantes. Quod si igi-
tur hominum aspectui puram objicere faciem allaboramus; non-
ne multo magis, ut in conspectu omnia intuentis DEI â vitæ ma-
culis puri appareamus, annitendum nobis erit? Non sufficit, de-
fectus agnovisse; sed emendare eos oportet. Quod quam negle-
ctum â nobis sæpè fuerit, propria cuicunq; conscientia testabitur,
segnitiei desidiiq; culpabilis, si alibi, in hoc quam maximè, nos
met accusatura. Nunc autem tempus est, *O CIVES!* quo & alioquin
nullo tempore destituimur, purgandi vitam nostram â peccato-
rum sordibus, ubi sanctitas Servatoris nostri, quam in vita ex-
primere tenemur, in speculo passionis ejus ob oculos nobis de-
picta sistitur. Insequamini proinde vestigia ipsius, ejus imitemini
exemplum. Præsertim hoc sanctissimo tempore, quo acerbissi-
marum, quas nostrum loco perpeffus est, passionum memori-
am recolit Ecclesia. Cavete Vobis, oro hortorque, ab omni im-
punitate, *αὐτοψία*, petulantia & quicquid Christianorum turpare
vitam potest. Sunt de cetero quoque tam formidolosa tempora
nostra, quæ vel sola nos admoneant, ut, vitatis omnibus sæculi
vitiis & mundanis vanitatibus abdicatis, ad seriam tandem aliquan-
do pœnitentiam confugiamus, & non superficiali vitæ emen-
dationi studeamus omni, qui possibilis est, conatu. Quandoqui-
dem autem id nobis, ut nobis, possibile minimè est, Sanctissimum
DEUM devotissimis precibus imploremus, ut Spiritum suum in
corda nostra effundat, qui ipse nos sanctificet totos, ut integer
noster spiritus, & anima, & corpus, ita ut in nullo possimus cul-
pari in adventu DOMINI nostri JESU Christi, servetur. Idq;
ipse faxit per & propter Christi, unici Salvatoris ac Do-
mini nostri, passionem atq; mortem. Amen!

P. P. Sub! Sigillo Academiae

Domin. Quinquages.

d. 3. Mart. Anno MDCCXV.